




# Strategi lautan biru UMP bersama ECERDC dalam membangunkan masyarakat luar bandar

Strategi Lautan Biru (*Blue Ocean Strategy*) yang digarapkan dalam pelaksanaan Program Pembangunan Modal Insan oleh UMP bersama Majlis Pembangunan Wilayah Ekonomi Pantai Timur (ECERDC) ini bertujuan memberikan mereka peluang pekerjaan agar dapat menikmati taraf hidup yang lebih baik pada masa hadapan.



Oleh:  
ZAINAL BIN BAHARI  
zainal@ump.edu.my

Kewujudan Universiti Malaysia Pahang (UMP) menjadi pemangkin dalam merencanakan pembangunan di negeri Pahang bukan sahaja dalam menghasilkan bidang kepakaran universiti namun ianya sekaligus meningkatkan taraf hidup masyarakat, merangsang pertumbuhan ekonomi, memudahcara transformasi dan yang pastinya terus memberi manfaat besar kepada penduduk sekitar.

Strategi Lautan Biru (*Blue Ocean Strategy*) yang digarapkan dalam pelaksanaan Program Pembangunan Modal Insan oleh UMP bersama Majlis Pembangunan Wilayah Ekonomi Pantai Timur (ECERDC) ini bertujuan memberikan mereka peluang pekerjaan agar dapat menikmati taraf hidup yang lebih baik pada masa hadapan. Dengan sasarannya terhadap penduduk luar bandar yang terdiri dalam kalangan golongan miskin tegar, wanita dan belia yang tinggal jauh dari bandar, usaha yang dijalankan tiga tahun lalu kini mula menampakkan kejayaan hasil usaha sama melibatkan gandingan kerjasama erat antara UMP dan ECERDC ini.

Melalui kluster pendidikan yang diperkenalkan dalam Program Empower ECER

ianya mampu meningkatkan kefahaman masyarakat luar bandar terhadap nilai keusahawanan yang boleh menjana pendapatan yang lebih tinggi terutamanya dalam kalangan peserta agropolitan di Runchang, Lepar dan Tangga Batu yang juga dinikmati penduduk di sekitar Kuala Pahang.

Bersesuaian dengan kewujudan UMP yang terletak berhampiran dengan kawasan Zon Ekonomi Khas ECER, ianya turut menjadi penggerak terhadap pelaksanaan Program Empower ECER Mahkota Kuala Pahang yang diilhamkan sendiri Canselor UMP, Kebawah Duli Yang Teramat Mulia Tengku Mahkota Pahang Tengku Abdullah Al-Hajj Ibn Sultan Haji Ahmad Shah Al-Musta'in Billah yang mensasarkan pembangunan akademik dan kemahiran khususnya di Mukim Kuala Pahang. Ianya kini dilihat semakin berkembang dan meluas ke beberapa lokasi sekitar daerah Pekan bermula tahun ini.

Program yang dilaksanakan ECER dan UMP yang diterjemahkan melalui program khidmat komuniti ini menjadi medan interaksi di antara warga UMP dengan masyarakat melibatkan beberapa projek yang diusahakan bersama beberapa jabatan

di UMP iaitu Pusat Pengajian Berterusan & Pembangunan Profesional (CENFED) atau kini dikenali sebagai UMP Advanced Education (UAE) dengan kerjasama Persatuan Wanita UMP (MATAHARI).

Di samping Program Pembangunan Akademik, inisiatif lain yang dijalankan ialah Latihan Kemahiran & Keusahawanan. Inisiatif ini mampu mentransformasi aras pencapaian sosioekonomi dan taraf hidup kumpulan sasaran yang terlibat dalam jangka masa panjang bagi meningkatkan motivasi dan pencapaian akademik pelajar serta menyuntik





semangat peserta untuk menempuh kehidupan dengan lebih maju. Program Latihan Kemahiran & Keusahawanan yang dijalankan ialah Kursus Kulinari (Masakan 1Malaysia); Kursus Penjagaan Selepas Bersali; Kursus Tatarias Kecantikan (Rawatan Muka, Badan & Solekan); Kursus Dandan & Spa Rambut; Kursus Jahitan; Kursus Pendawaian Elektrik; Kursus Sijil Keselamatan & Kesihatan Pekerjaan dan Program Pembangunan & Bimbingan Keusahawanan.

### Program pendidikan penggerak pembangunan modal insan

Begitu juga dengan bidang pendidikan yang memainkan peranan yang penting dalam memacu ekonomi negara malah sebagai enjin utama dalam menggerakkan pembangunan modal insan penduduk luar bandar. Justeru, Program Latihan Akademik Empower ECER Mahkota ini memberi peluang anak peserta Agropolitan dan sekolah-sekolah terpilih daerah Pekan yang akan menduduki peperiksaan Ujian Pencapaian Sekolah Rendah (UPSR), Penilaian Tingkatan 3 (PT3) dan Sijil Peperiksaan Malaysia (SPM) mengikuti kelas tuisyen, kem motivasi, seminar peperiksaan, *Super Camp*, latihan dalam kumpulan (LDK), Modul Sains, Matematik & Teknologi (SMT), lawatan sambil belajar, *Ghani Format Learning Methodology* dan program inovasi berkonsepkan Celik Komputer atau Teknologi Maklumat (IT).

Program yang bermula pada 2011, telah melibatkan seramai 2,057 pelajar luar bandar memperoleh manfaat daripada program program pembangunan akademik ini yang digerakkan oleh pensyarah dan pelajar UMP serta sokongan daripada pihak sekolah dan Pejabat Pelajaran Daerah. Antara sekolah yang terlibat adalah Sekolah Kebangsaan Indera Shahbandar, Sekolah Kebangsaan Serandu, Sekolah Kebangsaan Lepar, Sekolah Kebangsaan Runchang, Sekolah Jenis Kebangsaan Cina Yoke Hwa, Sekolah Kebangsaan Tanah Puteh, Sekolah Kebangsaan Peramu Jaya, Sekolah Kebangsaan Pekan Jaya, Sekolah Kebangsaan Sri Maulana, Sekolah Kebangsaan Tanjung Batu, Sekolah Kebangsaan Nenasi, Sekolah Menengah Kebangsaan Indera Shahbandar, Sekolah Menengah Kebangsaan Peramu Jaya, Sekolah Menengah Kebangsaan Dato' Mahmud Mat, Sekolah Menengah Kebangsaan Pekan, Sekolah Menengah Kebangsaan Nenasi dan Sekolah Menengah Kebangsaan Lepar, Pekan.

UMP dan ECERDC turut melaksanakan program latihan dan motivasi melibatkan seramai 802 peserta projek Agropolitan Pekan yang terdiri dalam kalangan penduduk

dari Agropolitan Batu 8 Lepar, Agropolitan Runchang dan terbaharu Agropolitan Tanjung Batu sebagai usaha memberi kesedaran peserta untuk turut berperanan bagi meningkatkan pencapaian pelajar dan kepentingan pendidikan untuk mengubah taraf hidup mereka.

### Program Latihan Kemahiran

Turut diperkenalkan adalah latihan kemahiran yang dapat meningkatkan taraf ekonomi dalam kalangan belia dan golongan wanita di kawasan Pekan apabila seramai 225 orang peserta program yang melibatkan belia, suri rumah dan ibu tunggal mengikuti lapan program yang ditawarkan iaitu Kursus Kulinari (Masakan 1Malaysia); Kursus Penjagaan Selepas Bersalin; Kursus Tatarias Kecantikan (Rawatan Muka, Badan & Solekan); Kursus Dandan & Spa Rambut; Kursus Jahitan; Kursus Pendawaian Elektrik; Kursus Sijil Keselamatan & Kesihatan Pekerjaan dan Program Pembangunan & Bimbingan Keusahawanan. Program yang memakan masa selama dua tahun dan dijalankan secara hujung minggu termasuk bimbingan oleh usahawan berjaya dengan sasaran setiap peserta mampu untuk membuka perniagaan sendiri dan meningkatkan pendapatan selepas mengikuti program ini.

Hasil usaha ini, peserta kini mampu memperoleh pendapatan tambahan antara RM800 hingga RM1,500 sebulan dan terdapat dalam kalangan peserta yang berjaya mengembangkan perniagaan dan memiliki pendapatan bulanan mencecah empat angka. Antaranya adalah Nor Lisa Azam yang membuka perniagaan De' Kuala Café di Bangunan RTC Pahang, Hafiz Musa, di Kiosk Telefon Bimbit di Pekan dan Shabidin Daniel yang membuka Bengkel Automotif di Kampung Bentan, Pekan.

### Kepakaran UMP terokai penyelidikan lebih inovatif

Dalam berkongsi kepakaran dalam bidang pembangunan penyelidikan, UMP terus aktif dalam meneroka idea-dea baharu yang lebih kreatif dan inovatif dengan memberi peluang seluas-luas dalam kalangan penyelidikannya untuk memanfaatkan ilmu teknologi yang dapat menyumbang terhadap peningkatan kualiti dalam kehidupan rakyat di negara ini.

Kerjasama lain juga melibatkan kerjasama UMP, ECERDC dan Perbadanan Bioteknologi Malaysia (BioTech Corp) dalam merealisasikan hasrat menjadikan Pahang sebagai Pusat Bio-aromatik dengan pembangunan Pahang Bio-aromatic Park. Usaha digerakkan menerusi inisiatif membangunkan potensi komersial

pati minyak dari tumbuhan herba yang dipanggil nilam dan seterusnya berkembang dengan penubuhan Pusat Kecemerlangan (COE) Bio Aromatik di UMP.

Begitu juga dengan Syarikat Evolve Holding SA yang turut mengumumkan bakal bekerjasama dengan UMP bagi menubuhkan sebuah Pusat Kecemerlangan Sainstifik Sebatian Semulajadi di bawah kluster perisa dan *fragrance* di negeri Pahang bagi menyokong usaha menjadikan negeri Pahang sebagai Pusat Bio-Aromatik.

Projek ini memperlihatkan peranan BiotechCorp selaku pemudahcara di bawah Program Transformasi Perdana Bioekonomi Malaysia (*Bio-Accelerator* Pembangunan Teknologi dan Inovasi) bagi pembangunan sebatian semula jadi menggunakan platform pengeluaran berasaskan yis penapaian dengan matlamat mewujudkan satu paradigma baharu dalam pengeluaran yang mampan bagi sebatian semulajadi bernilai tinggi di Malaysia.

Wujudnya industri baharu ini pastinya dapat memberi peluang merencanakan ekonomi kepada penduduk setempat dengan penawaran bidang kerja baharu untuk dinikmati penduduk khususnya di negeri ini.

Terkini, menerusi Program Empower ECER Mahkota ini juga, satu kompleks medan ikan bakar dan pusat pengumpulan serta jualan hasil laut akan dibangunkan di Kuala Pahang. Kompleks ini akan diusahakan oleh bekas peserta bimbingan Program Kulinari (Masakan 1Malaysia) Program Empower ECER Mahkota. Kompleks tersebut kini dalam proses pembinaan dan dijangka akan mula beroperasi pada hujung tahun hadapan.

### Kesimpulannya

Pelbagai inisiatif yang dijalankan UMP ini juga mampu mentransformasi aras pencapaian sosioekonomi dan taraf hidup kumpulan sasaran yang terlibat dalam jangka masa panjang bagi meningkatkan motivasi, kehadiran dan pencapaian akademik pelajar serta menyuntik semangat mereka untuk menempuh kehidupan dengan lebih maju. Kewujudan UMP kini bukan sahaja diketahui dan dilihat perkembangannya malah lebih dirasai dan dimanfaatkan bersama penduduk setempat. Malahan, penglibatan pelajar dalam menjayakan inisiatif ini juga mampu meningkatkan kebolehpasaran graduan yang akan memberi nilai tambah kepada pelajar dalam melahirkan graduan yang bersifat futuristik, berfikiran baharu dan bertatasusila tinggi pada masa depan.

Penulis ialah Pengurus Program Empower ECER Mahkota UMP.